

Rebecca Evans AS

Y Gweinidog Cyllid a Llywodraeth Leol

28 Gorffennaf 2022

Annwyl Rebecca

Cydsyniad Deddfwriaethol: Bil Caffael Llywodraeth y DU

Yn ein cyfarfodydd ar 6 Gorffennaf a 11 Gorffennaf, gwnaethom drafod Memorandwm Cydsyniad Deddfwriaethol ("Memorandwm") Llywodraeth Cymru ar y Bil Caffael ("y Bil"). Cytunodd y Pwyllgorau y dylem ysgrifennu atoch i ofyn am eglurhad ynghylch nifer o faterion. Byddem yn gwerthfawrogi cael eich ymateb i'r cwestiynau a ganlyn erbyn 5 Medi 2022.

1. I ba raddau y mae Llywodraeth Cymru wedi ystyried defnyddio'r amser y mae wedi'i nodi ar gyfer y Bil Partneriaeth Gymdeithasol a Chaffael Cyhoeddus (Cymru) i gyflwyno Bil caffael ehangach a fyddai'n cynnwys cwmpas Bil Caffael y DU a'r Bil Partneriaeth Gymdeithasol a Chaffael Cyhoeddus (Cymru)?
2. Yn ôl cyngor a gawsom gan y Cwnsler Cyffredinol, nid yw adnoddau na chapasiti yn broblem o ran cyflwyno Biliau Cymreig. O ystyried nifer sylweddol y darpariaethau mewn meysydd datganoledig yn y Bil a'r arbenigedd sydd ar gael i Lywodraeth Cymru ar faterion caffael, pam na ddefnyddiodd Llywodraeth Cymru adnoddau i ddatblygu Bil caffael ehangach, mwy cydlynol?
3. O gofio bod y maes polisi cyhoeddus hwn mor bwysig, pam y'i hystyrir yn briodol mabwysiadu dull deddfwriaethol sy'n atal Aelodau etholedig o'r Senedd rhag gwneud gwaith craffu deddfwriaethol manwl ar destun y Bil, gan gynnwys ymgysylltu â rhanddeiliaid yng Nghymru?
4. Pa mor hygyrch fydd y drefn gaffael newydd a hithau'n cael ei rhannu rhwng dau Fil?



5. I ba raddau yr ydych chi a'ch swyddogion wedi ymwneud â'r broses o lunio a drafftio cymalau ym Mil Caffael y DU? A oedd angen i chi fel Gweinidog gymeradwyo cymalau unigol?
6. Pa waith ymgynghori a gynhaliwyd â rhanddeiliaid Cymru i lywio'r broses ddrafftio?
7. Pa rôl y mae'r fframwaith cyffredin dros dro ar gyfer caffael cyhoeddus wedi'i chwarae yn natblygiad y Bil?
8. Mae Llywodraeth y DU o'r farn y bydd angen cydsyniad y Senedd ar gymalau 114 a 116. A allech amlinellu sut yr ydych wedi dod i'r casgliad nad oes angen caniatâd y Senedd ar gymalau 114 ac 116?
9. Mae cymalau 50, 62, 63, 65, 79 ac 80 yn cynnwys pwerau Harri VIII i Weinidogion Cymru, yn ddarostyngedig i'r weithdrefn negyddol. Pa rôl a chwaraewyd gennych o ran dewis y gweithdrefnau hyn ac a ydych yn credu bod y weithdrefn negyddol yn briodol ar gyfer y pwerau hyn?
10. A allwch roi naratif ar gyfer y pwerau cydredol yn y Bil a sut mae'r dull a fabwysiadwyd gan Lywodraeth Cymru yn cydymffurfio â'i chanllawiau ar y mater hwn?
11. Pa ddadansoddiad ydych chi wedi'i wneud o ran sut y mae pob cymal o'r Bil yn wahanol i'r sefyllfa deddfwriaethol bresennol neu'n gopi union ohoni, ac a gaiff y Pwyllgorau weld y dadansoddiad hwn?
12. A ydych wedi cynnal asesiad effaith penodol i Gymru o'r Bil fel y'i cyflwynwyd?
13. Mae'r Memorandwm yn nodi "Mae'n debyg y bydd nifer o gostau'n gysylltiedig â'r gwaith o ddiwygio caffael cyhoeddus yng Nghymru, er nad yw'r union fanylion wedi cael eu cadarnhau hyd yn hyn". A allwch chi ymrwmo i rannu manylion y costau hyn â'r Pwyllgorau unwaith y byddant wedi'u cadarnhau?
14. A allech roi'r wybodaeth ddiweddaraf am y trafodaethau â Llywodraeth y DU o ran gwelliannau sy'n cael eu cyflwyno i'r Bil i fynd i'r afael â'r pryderon a nodir gennych ym mharagraff 119 o'r Memorandwm?
15. A ydych chi wedi defnyddio'r trefniadau cysylltiadau rhynglywodraethol newydd i ddatrys materion sy'n peri pryder?
16. A wnewch chi gyflwyno eich deddfwriaeth eich hun i gwmpasu materion sy'n peri pryder na allwch eu datrys?
17. A wnewch chi ymrwmo i **beidio** â defnyddio cytundeb rhynglywodraethol gyda Llywodraeth y DU fel mecanwaith ar gyfer datrys eich pryderon?



18. Beth fydd eich cyfranogiad chi a'ch swyddogion drwy gydol y broses graffu a diwygio yn San Steffan?
19. Pa reoliadau ydych chi'n rhagweld a fydd yn angenrheidiol i weithredu'r diwygiadau o dan y Bil ac o dan ba bwerau (a gweithdrefnau) yn y Bil? A fydd y rheoliadau hynny a gyflwynir gan Weinidogion Cymru yn gyson ag unrhyw rai a ddatblygir gan Weinidogion Llywodraeth y DU?

Yn gywir,



Mark Isherwood

Cadeirydd y Pwyllgor Cyfrifon Cyhoeddus a Gweinyddiaeth Gyhoeddus



Huw Irranca-Davies

Cadeirydd y Pwyllgor Deddfwriaeth, Cyfiawnder a'r Cyfansoddiad

